

3. 2017թ.-ի հուլիսի 26-ին «Էլամոդա» ՍՊԸ-ի հետ կնքվել է **5,429.52** հազ. դրամի պայմանագիր, որով կատարվել է 60 հատ ամառային համազգեստի, 60 հատ ձմեռային համազգեստի, 60 հատ ամառային դաշտային համազգեստի գնում:

Հարկ է նշել նաև, որ ՀՀ կառավարության 2005թ.-ի օգոստոսի 18-ի № 2085-Ն որոշմամբ սահմանվել է Տեսուչի համազգեստի և Տեսչական մարմնի տարբերանշանի նկարագրերը և ձևերը: Համաձայն այս որոշման 1-ին կետի բ) գ) դ) ե) ենթակետերի տղամարդ Տեսուչի ձմեռային համազգեստը պետք է լինի բրդյա կտորից, 2-րդ կետի բ) գ) դ) ե) ենթակետերի տղամարդ Տեսուչի ամառային համազգեստը պետք է լինի բամբակյա կտորից սակայն գնման 26.07.2017թ.-ի կնքված № « ՀՀ-ԲՆ-ԳՀ-ԱՊՁԲ-17/13-1» ծածկագրով պայմանագրի հավելված 1-ով հաստատված տեխնիկական բնութագրում տղամարդու ձմեռային համազգեստը պատվիրված և գնված է բամբակյա կտորից, իսկ գնման 26.07.2017թ.-ի կնքված № « ՀՀ-ԲՆ-ԳՀ-ԱՊՁԲ-17/13-2» ծածկագրով պայմանագրի հավելված 1-ով հաստատված տեխնիկական բնութագրում տղամարդու ամառային համազգեստը պատվիրված և գնված է բրդյա կտորից:

Հարցմանն ի պատասխան տարածքային մարմինների աշխատակիցները հայտնել են, որ համազգեստները ներկայումս չեն կրում՝ չափսերի անհամապատասխանության և որակազրկված լինելու պատճառով

Այսինքն, ամառային համազգեստը գնել են բրդյա կտորից, իսկ ձմեռայինը՝ բամբակյա, թեև պետք է լիներ հակառակը:

Հավելենք, որ մեր հարցմանն ի պատասխան տարածքային մարմինների աշխատակիցները հայտնել են, որ համազգեստները ներկայումս չեն կրում՝ չափսերի անհամապատասխանության և որակազրկված լինելու պատճառով:

Այսպիսով, հաշվի առնելով վերոգրյալը, հաշվեքննող խումբը հաշվեքննվող ժամանակաշրջանում՝ 2017թ. -ի հունվարի 1-ից 2018թ. -ի սեպտեմբերի 30-ը, արձանագրել է հետևյալ խեղաթյուրումներն ու անհամապատասխանությունները՝

1. Տեսչական մարմինը չի կատարել ՀՀ բնապահպանության նախարարի 2006թ. մայիսի 17-ի № 153-Ն հրամանով ամրագրված համազգեստ կրելու պարտավորությունը, ինչը չի համապատասխանում նաև «Բնապահպանական վերահսկողության մասին» ՀՀ օրենքի 16-րդ հոդվածի դրույթների պահանջներին:
2. «Դերձակ» և «Էլամոդա» ՍՊԸ-ների հետ պետության կարիքների համար ապրանքի մատակարարման « ՀՀ-ԲՆ-ԳՀ-ԱՊՁԲ-17/13-1» և « ՀՀ-ԲՆ-ԳՀ-ԱՊՁԲ-17/13-2» պայմանագրերի մաս կազմող հավելվածներով սահմանված տեխնիկական բնութագրերը չեն համապատասխանում ՀՀ կառավարության 2005թ.-ի օգոստոսի 18-ի № 2085-Ն որոշմամբ ամրագրված Տեսուչի ամառային և ձմեռային համազգեստների նկարագրերին:
3. 2017-2018թթ. տեսչական մարմնի կողմից կատարվել է **9,597.96** հազ. դրամի հանդերձանքի գնման անարդյունավետ ծախս:

Առաջարկություններ

Հաշվեքննության ընթացքում արձանագրված անհամապատասխանությունների կամ խեղաթյուրումների վերաբերյալ հաշվեքննության օբյեկտի ղեկավարությանը և այլ շահագրգիռ կողմերին ներկայացվում են հետևյալ առաջարկությունները՝

Տեսչական մարմին՝

1. Կատարել ՀՀ բնապահպանության նախարարի 2006 թ. մայիսի 17-ի N 153-Ն հրամանով ամրագրված համազգեստը ամենօրյա ծառայողական պարտականությունները կատարելու, ատեստավորման, հատուկ ուսուցման և վերապատրաստման ժամանակ, իսկ դաշտային համազգեստը՝ դաշտային պայմաններում իրականացվող ստուգումների և ստուգայցերի իրականացման ժամանակ կրելու պարտավորությունը:
2. Անարդյունավետ ծախս չկատարելու համար բնապահպանական տեսուչի համազգեստի գնումը կատարել տեսուչների համազգեստների չափսերին համապատասխան:
3. Գնման տեխնիկական բնութագրերը կազմել ՀՀ կառավարության 2005թ-ի օգոստոսի 18-ի N 2085-Ն որոշմամբ սահմանված բնապահպանության տեսուչի համազգեստի և Տեսչական մարմնի տարբերանշանի նկարագրերին և ձևերին համապատասխան:

Հաշվեքննության օբյեկտների ղեկավարների պատրասխան

Տեսչական մարմին՝

Տեսչական մարմնի կողմից «Հաշվեքննիչ պալատի մասին» ՀՀ օրենքի 35-րդ հոդվածի 3-րդ մասով սահմանված 10 օրյա ժամկետում չի ներկայացվել առարկություններ և բացատրություններ՝ կազմված հաշվեքննության արձանագրությունում նշված անհամապատասխանությունների կամ խեղաթյուրումների, ինչպես նաև այլ տեղեկատվության վերաբերյալ:

ՀՀ բնապահպանության նախարարություն՝

ՀՀ բնապահպանության նախարարության կողմից այս կետի վերաբերյալ ներկայացված դիրքորոշումներն էական առումներով որևէ հիմնավոր պարզաբանումներ չեն պարունակել, կրել են հիմնականում բացատրական բնույթ և հաշվեքննության խմբի կողմից չեն ընդունվել:

IX. ԱՌԳՐԱՎԱԾ ԲՆԱԿԱՆ ՌԵՍՈՒՐՍՆԵՐԸ

«Բնապահպանական վերահսկողության մասին» ՀՀ օրենքի 12-րդ հոդվածի 1-ին մասի է) կետի և 13-րդ հոդվածի 1-ին մասի է) կետի դրույթների համաձայն Տեսուչը պարտավոր է ապահովել առգրավված բնական ռեսուրսների, որսի, որսագործիքների և որսի գործիք համարվող այլ միջոցների՝ օրենքով և իրավական այլ ակտերով սահմանված տնօրինման կարգի պահպանումը, որը համաձայն օրենքի 30-րդ հոդվածի 6-րդ մասի սահմանում է ՀՀ կառավարությունը:

ՀՀ կառավարության 2005 թվականի սեպտեմբերի 22-ի «Ստուգման ժամանակ հայտնաբերված և առգրավված ապօրինի ձեռք բերված բնական ռեսուրսների (ներառյալ՝ որսի)

տնօրինման կարգը (այսուհետ՝ Կարգ) հաստատելու մասին « № 2168-Ն որոշմամբ սահմանվել է ստուգումների ժամանակ հայտնաբերված և առգրավված՝ ապօրինի ձեռք բերված բնական ռեսուրսների՝

- ա) կենսառեսուրսների՝ վայրի խոտաբույսերի, թփերի, ծառերի, այդ թվում՝ փայտանյութի և վայրի կենդանիների ու դրանց արգասիքների,
- բ) հողի բերրի շերտի,
- գ) օգտակար հանածոների տնօրինման կարգը:

Կարգի 2-րդ կետի համաձայն արագ փչացող առգրավված կենսառեսուրսներն անհատույց հանձնվում են տվյալ մարզի կամ համայնքի (կամ հարակից մարզի կամ համայնքի) մանկատներին կամ ծերանոցներին, թանգարաններին՝ Տեսչական մարմնի տարածքային ստորաբաժանման ղեկավարի և ընդունող կազմակերպության ղեկավարի կողմից կազմված հանձնման-ընդունման արձանագրության հիման վրա՝ անասնաբուժասանիտարական փորձաքննության մասին եզրակացությունից հետո:

Այսինքն, արագ փչացող առգրավված կենսառեսուրսները պետք է հանձնվեն միայն երեք կարգի հաստատությունների՝ մանկատներ, ծերանոցներ և թանգարաններ, այնինչ եղել են դեպքեր, երբ դրանք հանձնվել են մանկապարտեզների, տուն ինտերնատների, հիվանդանոցների՝ ընդ որում անասնաբուժասանիտարական փորձաքննության բացակայության պայմաններում:

Կարգի 3-րդ կետի համաձայն առգրավված կենդանի վայրի կենդանիները Տեսչական մարմնի տարածքային ստորաբաժանման Տեսուչների կողմից ազատ են արձակվում բնական միջավայր՝ տվյալ մարզպետարանի բնապահպանական բաժնի և համապատասխան անտառպետության աշխատողների մասնակցությամբ, ինչը արձանագրվում է, իսկ ազատ արձակման պահը տեսագրվում:

Շատ հաճախ նման դեպքերում բացակայում է և՛ արձանագրությունը, և՛ տեսագրությունը:

Կարգի 4-րդ կետի համաձայն թփերն ու խոտաբույսերը, բացառությամբ դեղաբույսերի, ոչնչացվում են Տեսչական մարմնի համապատասխան տարածքային ստորաբաժանման ղեկավարի կողմից ստեղծված՝ 3 մարդուց բաղկացած հանձնաժողովի կողմից, որում ընդգրկված է նաև համապատասխան անտառտնտեսության ներկայացուցիչը: Ոչնչացման փաստն արձանագրվում է, իսկ ոչնչացման պահը՝ տեսագրվում, իսկ առգրավված դեղաբույսերը հանձնվում են ՀՀ առողջապահության նախարարությանը՝ ի տնօրինում:

Տեսչության կողմից նման դեպքերում հանձնաժողով չի կազմվում, իսկ արձանագրություններն ու տեսագրությունները բացակայում են

Տեսչության կողմից նման դեպքերում հանձնաժողով չի կազմվում, իսկ արձանագրություններն ու տեսագրությունները բացակայում են: